


重修

植物名實圖考

小野職慤重修
陽草類

十一
下

馬先蒿



馬先蒿 卽角蒿

馬先蒿、本經、中品、陸璣詩疏、蔚、牡蒿、三月始生、七月華、華似胡麻華、而紫赤、八月爲角、角似小豆角、銳而長、一名馬新蒿、據此、則馬新蒿、卽角蒿、唐本草、角蒿係重出、李時珍、但以陸釋牡蒿爲非、而不知所述形狀、卽是角蒿、則亦未細審、今以馬先蒿爲正、而附角蒿諸說於後、

〔長編〕本草經、馬先蒿、味平、主寒熱、鬼疰、中風、濕痺、女子帶下病、無子、一名馬尿蒿、

別錄、苦無毒、生南陽川澤、陶隱居云、方云、一名爛石草、主惡瘡、方藥亦不復用、唐本草注、葉大如茺蔚、花紅白色、二月八月、采莖、葉陰乾用、八月九月、實熟、俗謂之虎麻、是也、一曰、馬新蒿、所在有之、茺蔚、苗短小、其子夏中熟、二物初生、極相似也、

嘉祐本草、按爾雅云、蔚、牡蒿、註云、卽蒿之無子者、詩云、匪我伊蔚、陸璣云、牡蒿

也、二月始生、七月開花、似胡麻花、而紫赤、八月生角、似小豆角、銳而長、一名馬新蒿、是也、

本草綱目、李時珍曰、別錄、牡蒿、馬先蒿、原是二條、陸璣所謂、有子者、乃馬先蒿、而復引無子之牡蒿釋之、誤矣、

角蒿、唐本草註、角蒿、味辛、苦平、有小毒、主甘濕蠱、諸惡瘡、有蟲者、註、葉似白蒿、花如瞿麥、紅赤可愛、子似王不留行、黑色、作角、七月八月採、

蜀本草圖經、葉似蛇床、青蒿等、子角似蔓菁、實黑細、秋熟、所在皆有之、

救荒本草、猪牙菜、本草名角蒿、一名莪蒿、一名蘿蒿、又名禪蒿、舊云、生高嶺、及澤田墾洳處多有、今處處有之、生田野中、苗高一二尺、莖葉如青蒿、葉似斜蒿、葉而細、又似蛇床子葉、梢間開花、紅赤色、鮮明可愛、花罷結角、子似蔓菁、角長二寸許、微彎、中有子、黑色、似王不留行子、採嫩苗莖葉、燉熟、水浸去苦味、淘淨、油鹽調食、

蠶實



蠡實

蠡實、本經、中品、宋圖經、以爲卽馬蘭、北人呼爲馬棟子、又據顏氏家訓、荔挺、鄭注、馬薤也、說文、荔似蒲而小、根可爲刷、其說甚核、余曾以葉實治喉痺、良驗、北地人、今猶以其根爲刷、柔韌細潔、用久不敝、凡裹角黍、縛花接木、皆用其葉、亦便、

雩婁農曰、馬蘭、賤草、而月令記之、豈非以西北苦寒、冒土最先斂、三之日、積雪欲消、青青叢芽於輪蹄間者、非是物耶、其葉可繩、其實可藥、其根可刷、明吳寬詩、爲帚或爲拂、用之材亦良、根長者任之矣、又高岸崩時、合用栽、則此草乃堪護隄捍水耶、詩有之、雖有絲麻、無棄菅蒯、

〔長編〕本草、蠡實、味甘平、主皮膚寒熱、胃中熱氣、風寒、濕痺、堅筋骨、令人嗜食、久服輕身、花葉去白蟲、一名劇草、一名三堅、一名豕首、

別錄、溫無毒、止心煩滿、利大小便、長肌膚肥大、花葉療喉痺、多服令人溱洩、一

名荔實、生河東川谷、五月採陰乾、陶隱居云、方藥不腹用、俗無識者、天名精、亦名豕首也、

日華子、馬藺、治婦人血氣煩悶、產後血暈、消一切瘡癰、腫毒、止鼻洪、吐血、通小腸、消酒毒、治黃病、傳蛇蟲咬、殺葷毒、亦可蔬菜食、莖葉同用、

圖經、蠡實、馬藺子也、北人音訛、呼爲馬棟子、生河東川谷、今陝西諸郡、及鼎澧州、亦有之、近京尤多、葉似薤而長厚、三月開紫碧花、五月結實、作角、子如麻、大而色赤、有稜、根細長、通黃色、人取以爲帚、三月採花、五月採實、並陰乾用、謹按、顏氏家訓云、月令、荔挺出、鄭康成云、荔挺、馬薤也、易統驗玄圖云、荔挺不出、則國多火災、說文云、荔、似蒲而小、根可爲刷、爾雅云、荔、馬薤也、蔡邕高誘皆云、荔似挺出、然則、鄭以荔挺爲名、誤矣、此物、河北平澤、率生之、江東頗多、種於堦庭、但呼爲旱蒲、故不識馬薤、講禮者、乃以爲馬莧、亦名豚耳、俗曰馬齒者、是也、其花實皆入藥、列仙傳、寇先生者、宋人也、好種荔、食其葩實焉、今山人、亦單服其

實云、大溫益下、甚有奇效、崔元亮治喉痹腫痛、取荔枝皮根、共十二分、以水一升、煮取六合、去滓、含之、細細嚥汁、差止、

本草衍義、蠶寶、陶隱居云、方藥不復用、俗無識者、本經、諸家所注、不相應、若果是馬蘭、則曰華子、不當更言、亦可爲蔬菜食、蓋馬蘭、其葉、馬牛皆不食焉、纔出土、葉已硬、況又無味、豈可更堪人食也、今不敢以蠶寶爲馬蘭子、更俟博識者辨之、

按、蠶寶、卽馬棟、圖經引據本之、唐註甚覈、衍義、因陶隱居曰華子之說、遂謂諸家所註、皆不相應、然陶所不識多矣、曰華子、謂莖葉同用、此草有葉無莖、恐所說別是一種、余居澄懷園時、繞屋皆是、適有患喉痹者、夜半索藥、遂將此草捋付之、及早痛止、此其效也、味酸醎、與本經微異、此草喜生鹹地、故味鹹、馬不食者、以味酸故也、

顏氏家訓、書證篇、月令云、荔枝出、鄭元注云、荔枝、馬薤也、說文云、荔枝似蒲而小、

根可爲刷、廣雅云、馬薤、荔也、通俗文、亦云馬蘭、易統通卦驗元圖云、荔挺不出、則國多火災、蔡邕月令章句云、荔似挺、高誘注呂氏春秋云、荔草挺出也、然則月令注荔挺爲草名、誤矣、河北平澤、率生之、江東頗有此物、人或種於階庭、但呼爲旱蒲、故不識馬薤、講禮者、乃以爲馬莧、堪食、亦名豚耳、俗曰馬齒、江陵、嘗有一僧、面形上廣下狹、劉綬幼子民譽、年始數歲、俊悟、善體物、見此僧云、面似馬莧、其伯父劉綬、因呼爲荔挺法師、綬親講禮、名儒尙誤如此、


釋草小記、月令、仲冬之月、荔挺出、鄭氏注、荔挺、馬薤也、高誘注呂氏春秋云、荔馬薤、挺生出也、本草神農經云、薤實、一名劇草、一名三堅、一名豕首、爾雅、薤薤、名精、一名麥句、薤、別一物也、名醫增補云、一名荔實、唐本草注云、通俗文、一名馬蘭、蘇頌圖

經云、馬蘭子、北人音訛、呼爲馬蘭子、本草綱目、載圖經、作馬棟、又曰、按顏氏家訓云、月令、鄭康成注、荔挺、馬薤也、易統驗元圖云、荔挺不出、則國多火災、說文、荔似蒲而小、根可爲刷、廣雅、馬薤、荔也、蔡邕高誘皆云、荔似挺出、則鄭以荔挺爲名、誤矣、余

居豐潤二三月間、見草似幽蘭、叢生、近根處、則兩葉重重相包、如菖蒲、其葉中有劍脊、至四五寸、脊之兩旁、漸合而爲一邊、其脊自爲一邊、直上至末、則剡其一邊、如腰刀形、長者二尺許、開花、藕褐色、亦略似蘭、五月結實、有房、土人呼爲馬蓮、亦呼馬蘭、意其爲月令之荔也、形與韭薺相類、故又有馬薺之名、草甚堅韌、市人以貫錢、及繫物皆用之、玉篇言、蘭似莞、莞似蒲、並言可爲席、圖經言、江東呼旱蒲、與說文似蒲之說同矣、余寓中、階下有一本、霜降後、草披靡然、綠色不改、立冬節、視其根、則包中已有萌芽、小雪後、舊葉盡枯黃、冬至又視之、前所生芽、漸長亦漸枯、而新芽又間見錯出、其爲荔也無疑矣、漢書儒林傳、梁邱賀、宣帝時爲郎、會八月飲酎、行祠孝昭帝廟、先歐旄頭、劍挺墮地、師古曰、挺引也、劍自然引拔出也、說文、挺拔也、据所釋挺字之義、合諸高誘所謂挺生出者、似不得以荔挺二字、爲馬薺之名、然余讀東方朔傳云、以薺撞鐘、豈能發其音聲、是薺爲微弱之物、則凡草皆得謂之薺、而以荔挺爲荔草初出之名、若荔芽之云者、謂

荔之挺於是月出、如其不出、則當有火災、鄭氏非不知挺之言拔也、而据易緯爲左證、則挺出二字、乃不嫌重複、且時方出地、若以二字相連、謂挺然而出、是言出地久而長矣、反於事情不稱、鄭氏此釋、或非曲徇易緯與、寇宗奭云、蠶實以爲馬藟、則曰華子、不當言可爲蔬菜、蓋藟葉、馬牛皆不食、出土、葉已硬、又無味、豈可更堪人食、寇氏此說、据曰華所云、主蠶實可食、而馬藟、則不可食、故引陶通明言、蠶實人所不識、因亦不敢以馬藟當之也、余試採藟芽嘗之、誠不可食、然馬藟爲荔、則有確乎不可易者、曰華未深考荔之爲物、而漫說之耳、而李時珍、乃据救荒本草、言馬藟可作菜、反以寇氏爲欠考、何其謬也、至謂爾雅、荈馬帝卽荔、尤爲繆悠之談、夏小正、明言七月荈秀、乃荔秀於二三月、時珍曾未見太傳禮耶、

款冬花



款冬花

款冬花、本經、中品、爾雅、菟葵、顓頊、注、款冬也、圖經、列數種、救荒本草、款冬、葉似葵而大、開黃花、嫩葉可食、今江西、湖南、亦有此草、俗呼八角烏、與救荒本草圖符、從之、

雪蓑農曰、款冬、無實、而華于冬、傅咸賦序云、冰凌盈谷、積雪被崖、顧見款冬、煒然始敷、述征記云、洛水凝厲、款冬茂悅、余走炎鄉、久暎墳裂、憶昔燕郊、風餐雪饕、曾未睹植、堅冰爲膏壤、而吸霜雪以自豪者、章江歲除、始睹其藎、而詠物之作、輒以傲寒爲諛、郭景純云、吹萬不同、陽煦陰蒸、物體所安、焉知渙凝、款冬耀穎、信有徵矣、火邱之谷、有鼠與木、雪山之澗、有蛆與蓮、陽以陰育、陰以陽全、陰極陽極、其氣則偏、偏而不返、所生乃反、曝之不殘、其性必寒、斂之不卷、其性必暖、暖者陽和、寒者陰賊、閉雪窖、留陰山、而全節者、陽和之外溢也、視太陽服硫磺、而能敵者、陰賊之內熾也、麗江、小雪山有蛆焉、大者如兔、味如乳酥、多食、鼻

衄而口瘡、其奔子闌、粟地坪、有珠棧焉、實產雪彊、苦燥而彊、純陰之地所誕、乃陽永昌、南直緬甸、黑壤如灰、得火而燥、是有火杞花、毒於蜴虺、束而燎之、其藥不煨、又有相思草焉、是能爲祟、遇婦則低、饋夫則制、陰勝於陽、故居陽地、無陰不生、所生乃陰、無陽不化、所化乃陽、宜化而化、宜生而生、道之至中、不生而生、不化而化、道之至大、物不窮極、不見道大、極而不極、復見道中、萬物迴薄、振蕩相轉、忽然爲人、何足控搏、百卉困蠹、鳥知其然、順四時而各有宜、毋輒惑其所偏、

〔長編〕本草經、欬冬花、味辛溫、主欬逆、上氣、善喘、喉痺、諸驚癇、寒熱邪氣、一名橐吾、一名顒凍、一名虎鬚、一名菟奚、

爾雅、菟奚、顒凍、註、欬冬也、紫赤華、生水、中疏、藥草也、

別錄、甘無毒、主消渴、喘息、呼吸、一名冬冬、生常山山谷、及上黨水傍、十一月、採花陰乾、陶隱居云、第一出河北、其形如宿蓴、未舒者佳、其腹裡有絲、次出高麗

百濟其花乃似大菊花次亦出蜀北部宕昌而並不如其冬月在冰下生十二月正月旦取之

圖經欵冬花出常山山谷及上黨水傍今關中亦有之根紫色莖青紫葉似草薺十二月開黃花青紫萼去土一二寸初出如菊花萼通直而肥實無子則陶隱居所謂出高麗百濟者近此類也又有紅花者葉如荷而斗直大者容一升小者容數合俗呼爲蜂斗葉又名冰斗葉則唐註所謂大如葵而叢生者是也十一月採花陰乾或云花生於冰下正月旦採之郭璞註爾雅顥凍云紫赤花生水中水冰字近疑一有誤而傅咸欵冬賦序曰余曾逐禽登於北山於時仲冬之月也冰凌盈谷積雪被崖顧見欵冬燁然始敷華艷當是生於冰下爲正也本經主欵逆古今方用之爲治嗽之最崔知悌療久嗽熏法每旦取欵冬花如雞子許少蜜拌花使潤內一升鐵鑊中又用一瓦一椀鑽一孔孔內安一小竹筒筆管亦得其筒稍長作椀鑊相合及插筒處皆麪泥之勿令漏氣鑊下著